

Avegnir intschert dal rumantsch

La Scola politecnica federala na vul betg pli finanzia il rom rumantsch a l'università

■ (anr/ac) L'annunzia da la Scola politecnica federala da stritgar la contribuziun finanziata al rom rumantsch a l'Universitad da Turitg sin la fin da l'onn 2018 metta en dumonda la futura puschida universitara rumantscha a Turitg. Tant pli ch'il professor Clà Riatsch va en pensiun la fin dal 2017.

Per raschun da spargnar stritga la Scola politecnica federala la contribuziun finanziata al rom rumantsch puschida da l'Universitad da Turitg. Quai scriva il «Tages-Anzeiger» e menziuna che la Scola politecnica federala saja pronta da sbursar la contribuziun annuala da 100 000 francs en fin da l'onn 2018 per pussibilitar a l'universitad da chattar novas soluziuns per mantegnair la puschida rumantscha. Ina da las soluziuns novas discutas preveda dad integrar il rumantsch en in rom general linguistic. Per Clà Riatsch, ch'occupa en fin da l'onn 2017 la professura rumantscha a l'Universitad da Turitg, ina mesira cun consequenzas fatalas per ils futurs magisters da rumantsch en ils gimnasis e las scolas secundaras rumantschas. Per Riatsch èsi numnadain impurtant ch'il rumantsch restia lingua d'instrucziun a l'universitad. Sulet uschia possian las studentas ed ils students da differenta derivanza linguistica rinforzar lur enconuschientschas da la lingua rumantscha sur ils cunfins idiomatics e cun il rumantsch grischun. Entras l'integraziun da la puschida rumantscha en in rom linguistic general vegnissian las enconuschientschas davart la litteratura e la cultura rumantscha intermediadas en ina lingua estra. In ulteriur problem ord vista dal professor da rumantsch a l'Universitad da Turitg è la finamira da stritgar il segund rom lateral da la puschida. El ha



La Scola politecnica federala na vul betg pli finanzia il rom rumantsch a l'Universitad da Turitg.

MAD

explitgà che gist quel segund rom lateral carmalia en fin uss ils pli blers students al studi rumantsch. Per cumplacada valitescha Riatsch vinavant la collavraziun cun la Scola auta pedagogica da Turitg quai che pertutga ina puschida rumantscha. Là nua che students rumantschs han la pussaivladad da recaltgar ils diploms sin ils stgalims secundars in e dus.

Surstà da la decisiun

Surstà è il president da la Lia Rumantscha, Johannes Flury, da l'annunzia da

la Scola politecnica federala da stritgar la contribuziun al rom rumantsch da la universitad. L'anteriu manader la Scola auta pedagogica grischuna ha enconuschientscha da la discussiun davart l'avegnir da la puschida rumantscha a la Universitad da Turitg e dad esser integrà en la tschertga da soluziuns. Er ord sia vista fiss l'integraziun dal rumantsch en in rom general linguistic da l'universitad ina gronda perdita che avess consequenzas sin l'instrucziun rumantscha en las scolas secundaras ed en ils gimna-

sis grischuns. El ha discurre dad ina perdita da valor ed in svilup ad ina liugua rumantscha sulet pledada. Per il president da la Lia Rumantscha èsi indispensabel da seser a maisa cun ils quatter principals partenaris en chausa instrucziun rumantscha sin stgalim universitar. Sper las universitads da Turitg e Friburg èn quai tenor sia opiniun las duas scolas autas da pedagogia da Turitg e dal chantun Grischun. Dentant ha Fluri accentuà las pussaivladads limitadas da la Lia Rumantscha dad intervegnir en chaus-

sa. El ha ditg ch'il chantun Grischun reclomia per el la responsabladad quai che pertutgia la furmaziun ed uschia saja il chantun dumandà da chattar soluziuns cun ils partenaris.

Sajet en il dies

Dad in sajet en il dies ha il cusseglier guvernativ e chau dal departament dad educaziun, cultura e protecziun da l'ambient, Martin Jäger, discurre en connex cun l'annunzia da la Scola politecnica federala da stritgar la contribuziun al rom rumantsch a l'Universitad da Turitg. Per «inacceptabel» ha il cusseglier guvernativ valità il fatg che la regenza grischuna intervegnia ina tala mesira da las medias e ch'ella na saja betg vegnida infurmada uffizialmain da la Scola politecnica federala. Jäger ha menziunà la responsabladad da la Scola politecnica federala vers la quarta lingua essend che quella instituziun vegnia sco suletta universitad finanziada cumplainamain da la confederaziun. Entaifer il preventiv da quella scola auta sajan ils 100 000 francs a favur dal rom rumantsch ina piculezza. Il chau dal departament d'educaziun, cultura e protecziun da l'ambient ha ditg dad esser gia en contractivas da cuminanza cun la Lia Rumantscha cun l'Universitad da Turitg pertutgant l'avegnir da la puschida rumantscha a l'universitad. El è persvadi da chattar ina soluziun cuntentaivla ed ha fatg attent a la soluziun chattada cun l'Universitad da Friburg respectiv cun l'Institut per la plurilinguitad da mantegnair la professura rumantscha en quel lieu. Per prioritar ha Jäger valità la scolaziun da futuras magistras e futurs magisters rumantschs sin stgalim universitar.